



13. juni 2024

Inatsisartut suleriaasianni § 37 imm. 1 naapertorlugu Naalakkersuisunut apeqquteqaat imaattoq matumuuna saqqummiuppara.

#### **Naalakkersuisunut apeqqutit:**

- 1. Aalajangiiffigisassatut siunnersuummut, UKA2022/60, tunngatillugu naalagaaffimmut attaveqarsimanermut killiffimmik Naalakkersuisut paasissutissiisinnaappat?**
- 2. Aalajaniisoqarnerata kingunerisaanik suleriarnert suut ingerlanneqarsimappat, kiisalu maannamut killiffik sunaava?**
- 3. Angallanermut pigisanillu nalilinnut tunngatillugu inatsisiliornerup tinguneqarnissaannut piumasaqaataasut tamakkiisumik nalunaarusiorneqarnerisa naammassineqarnissaat qaqugumut naatsorsuutigineqarpa?**
- 4. Suliami uani aporfiusimasut kinguaattoorutaasimasullu suut, ilaatigut, maluginiarneqarsimasut taaneqarsinnaappat?**

(Inatsisartunut ilaasortaq Kuno Fencker, Siumut)

#### **Tungavilersuut:**

Aalajaangiiffigisassatut siunnersuummi, UKA2022/60, aalajangiunneqarpoq, angallanermut pigisanillu nalilinnut tunngatillugu inatsisiliornerup tinguneqarnissaannut piumasaqaatit ersarissarneqarnissaat siunertaralugu Naalakkersuisut naalagaaffimmut saaffiginnissuteqassasut. Namminersorneq pillugu inatsimmi ilassutit allattorsimaffianni I-mi allaqqavoq, suliasaqarfiit taakku Namminersorlutik Oqartussanut nuunneqarsinnaasoq, piffissaliineq aalajangiunneqarpat. Allattorsimaffimmi I-mi angallanermut kiisalu pigisanut nalilinnut tunngatillugu inatsisiliorneq, imm. c)-mi aamma d)-mi taaneqarput. Taamaattumillu Naalakkersuisut tamatumani aalajangiinissaminut pisinnaatitaaffeqarput, qaqugukut suliasaqarfiit taakku tinguneqarnissaannut, taamaalilluni Kalaallit Nunaata inatsisiliornikkut suliasaq tamakkiisoq suliarilersinnaallugu.

Ersarissaassuteqaqqusinermit siunertaavoq tingusinissamut, piumasaqaatit ersarissumik paasinarsarneqarnissaat sukumiisumik qulakkeerneqassammat. Aalajangiiffigisassatut siunnersuut, ulloq 24. November 2022, aalajangiiffigineqarpoq. Taamaattumik naalarulunnartutut oqaatigisariaqarpoq, ulloq manna tikillugu naalagaaffimmut attaviginnissimanermut atatillugu nalunaarusiortoqaranilu killiffimmik saqqummiussisoqanngimmat. Kinguaattoorneq una apeqqusernarpoq, ilumut Naalakkersuisut, suliasat pineqartut tinguneqarnissaannut suliniarnermi pingaartitsillutillu, pisariaqarluinnaraluartumik, suleriapallannissaminut pimoorussisimanersut.

Apeqqutigineqartut ullut suliffiusut qulit iluanni akeqquneqarput.